

四庫全書

集部

欽定四庫全書

攻媿集卷三十五

宋樓鑰撰

外制

給事中尤袤禮部尚書

敕官建儀曹俾司禮樂制作之事職專宗伯當用朝廷
老成之人閱一時侍從之臣極三朝髦俊之選求之公
論僉曰汝諧具官某學極羣書才兼數器被眷知于慈

展參察案于儲宮出入累年始終一節禁路論思之益
有衆人之所難瑣闡封駁之章至三進而未已積茲德
望處以文昌職務惟清實總夷夔之任謀猷可告尚殫
積契之忠

中書舍人黃裳給事中

敕朕惟舜命龍出納朕命而名官以納言蓋人君之命
不難于出而望其能納也瑣闡之職為朝廷喉衿古誼
昭然尤當遴擇具官某天資直諒學力粹深處之王邸

則有講導之益擢之詞掖則推潤色之工是用授爾以封駁之任非以序而遷也事有不可爾則盡言言而可從朕不吝改惟能知舜所以名官之意則能體朕所以命爾者矣

太常丞章穎軍器少監

敕具官某爾以倫魁之彥

倫魁見漢書揚雄傳是集屢用之一本改倫為掄非

端諒有聞進丞容臺預職史筆王邱講誦之益天官銓綜之公惟時名流兼此數器俾貳戎監是曰序遷萃之

象曰除戎器戒不虞此亦急務尚勉之哉

吏部員外郎汪義端監察御史

敕具官某朕選任臺端增置諫列惟六察之分職非一人之可為泛觀在廷識擢自我以爾早先衆俊屢試長才風儀凜然有御史之望聲譽籍甚乃故臣之家俾踐世家往贊而長屢更劇郡尚何學邑之拘輟自名曹庸示簡僚之重其祇朕命往振臺綱

右正言胡琢左司諫

敕具官某朕擢卿諫省亦既再歲端靖有守論事加詳
益聞古者有爭臣七人爾獨賢勞念之久矣增置諫列
俾正左虛之位其益究乃心暨乃僚相與補拾闕遺以
輔不逮俾朕導諫之風有聞于世亦惟休哉

監察御史何異右正言

敕具官某臺謀之選俱為甚重而職務自有不同臺臣
當糾官邪而諫省專裨主闕爾為六察亦既年餘屢進
封章凜有風采今予授以拾遺之職滋嚮用矣以我躬

之風盡造鄰之益則朕有聽言之美而爾亦無愧于古
爭臣矣

大理評事王補之大理寺丞

敕具官某爾家傳文法久任廷評遂為同列之首賢勞
著矣丞貳之職命爾遷焉罪宜惟輕繫古之訓移情就
法尚戒于茲

寶文閣直學士程大昌龍圖閣直學士提舉南京

鴻慶宮

敕朕收攬羣才緬懷耆德矧東宮賓友之舊游從琳瑯
之游冠西清學士之班爰峻河圖之直具官某才高而
能下氣勁而用冲幼學壯行曾不渝于一節出藩入從
實有聞于三朝退食自如著書不輟仰天觀象窮羲經
八卦之文畫地成圖洞禹貢九州之域茲繼廩人之粟
益高延閣之名故國有世臣尚賴典刑之重乃心在王
室毋忘猷告之忠

皇伯嗣秀王伯圭故妻秦國夫人宋氏追封兩國

夫人

敕伯父行尊已極三公之貴夫人德配孟疏二國之封
雖不逮于生榮顧可稽於卹典具封某起由戚閑歸我
宗英動惟圖史之遵居有珩璜之飾少同甘苦能與家
人而忘貧晚被寵光固宜君子之偕老云胡不淑弗永
其年賜湯沐之大邦既屢頒于翟弟無公侯之兩社爰
特畀于蜜章

蜜本諸晉書山濤傳所云云蜜印是集
屢用之一本訛蜜為密或改作宸亦非

以伸伉儷之情以厚幽冥之渥尚惟精爽式克欽承

御史臺檢法官李謙太常丞主簿彭龜年司農寺

丞

元係林大中辟差大中與郡張叔椿再辟解免

敕具官某等爾謙篤信好學表裏無玷爾龜年剛毅近仁氣節有聞又皆憂深思遠有拳拳愛君之心御史選也大中之辟叔椿之留豈其私哉而引義慨然若不可一朝居者朕既不汝捨而高爵非所以留之也容臺農扈分以命汝丞哉丞哉其少安之以俟選擇

都官員外郎趙謚戶部員外郎主管左曹

敕具官某爾祖父以直道佐中興配饗高廟子孫苟在
仕版以次拔用今位于朝惟爾一人外奏筠陽之課內
為秋官之屬恂恂自守尚有家風遷置母民毋懈于位

趙思璘知德慶府

敕具官某海康雖遠以高廟潛藩而增重選侯亦不輕
也爾以宗支之秀資歷寢高往撫是邦毋忽民事

都大提點坑冶鑄錢耿延年兩浙轉運判官

敕具官某部使者分行諸道在外則鍾官總貨泉之重

在內則畿漕任飛輓之繁皆遴選也爾長於心計敏歷已深新安之政興什植僵徹于予聽鼓鑄以佐用度又優為之計臺虛位亟以命汝或過其歸以副朕為官擇人之意

陳揚善知光州

敕具官某淳光舊為內郡今實竝邊牧民之任不輕畀也以爾嘗守輔邦見稱辦治自去郎省家食有年茲庸授以左符往臨邊徹撫民以寬處事以靜其庶幾乎古

之折衝者矣

知湖州趙不迹都大提點坑冶鑄錢

敕具官某爾秀出宗文以才自奮三試劇郡辨治有聞
惟時鍾官究山澤之利興鼓鑄之饒以佐國用非心計
優長風力强敏之士不足以當之輒自吳興俾趨臺治
檢柅吏奸導疏利源匪急匪徐惟正之供則爾之職舉
矣

知平江府沈揆司農卿

敕具官某朕臨御丕圖求賢如渴儲闡寮案選用無遺
蓋舉子所知非止篤舊故之恩也爾以儒學奮身周旋
清貫詞藻之發追配前良肆朕纂承之初最先收召出
守劇郡試之益詳矣漢二千石有治理效公卿缺則選
諸所表朱邑由北海入為大司農則其事矣朕之待汝
豈惟掌周稷之事哉往祇厥官嗣有褒陟

呂大麟知常德府

敕具官某本朝衣冠之族爵位相望文獻不墜未有盛

呂氏者也至于今日仕者寔寡慨然念之起爾于家以爾素守家法好學不哀宰郡有循良之稱在朝謹靖共之守去國既久退然自安武陵湖石與區外控五溪之徼思得賢牧以撫安之故舉以命爾爾尚勉哉能大其家則為報國

左丞相留正初除少保封贈
曾祖贈太師耀卿追封英國公

敕朕任賢甚專虛己以聽累奏篇之賞盍膺八命之崇

覽遜牘之勤始進三孤之重乃循故事加賁曾門具官
某生為善人世載隱德傳芳中古由王國大夫之有聞
席慶華宗去清源節度之未遠惟躬行無媿于幽顯故
家聲大啓于孫曾是生名儒致位上宰閔書屢錫已登
極品之官公社肇開爰胙真陽之土尚惟精爽歆此寵
靈

曾祖母周國夫人藥氏贈周國夫人

敕士有奮身而仕至元臣推恩而爵及曾祖嘗迹所自

必有其源豈惟奕世之賢仍多中饋之助夫或加寵婦
則從之具封某以柔淑之資嬪儒素之族積功累行雖
有良人之賢處順安時宜偕君子之老比及後裔是生
上台封既至于小君寵仍疏于大國不改周南之舊用
配留侯之祧其祗異恩以利後嗣

祖贈太師沂國公寔追封福國公

教德雖著州鄉而弗顯于朝廷身不及富貴而乃施乎
孫子此古入敢以自必而天報昭然不誣我有宗工恩

逮顯祖具官某坦坦幽人之履恂恂長者之風惟先世
以來有功于國故餘慶所及遂肥其家果見聞孫進登
孤保屢頒霈澤貴極師垣乃更沂水之舊封仍祚閩山
之鄉國九京未泯百世不忘

祖母楚國夫人洪氏贈商國夫人

敕婦道之修相夫以順家法之懿至孫而興雖寵榮不
及乎生前而恩渥屢加於身後具封某以幽閒之操崇
節儉之風夫婦俱賢蓋非一日之積室家流慶遂見百

年之餘賜湯邑于南荆易封圻于上洛以顯漏泉之澤
以慰含飴之思

父贈太師衛國公鑄追封魏國公

敕朕惟東周大夫留氏號稱世賢子國子嗟之父也俱
不見用詩人惜之此丘中有麻所由作也朕之用賢則
異於是具官某世有潛德生為醇儒雖富貴不在其身
而善慶乃積于後惟我碩輔秉國之鈞尊顯其親貴極
人臣斯教忠之效也既胙武公之土復更畢萬之封父

子之賢于是俱顯視東周之留為盛矣死而不忘其尚
知歆

前母燕國夫人鄭氏贈齊國夫人母秦國夫人
劉氏贈魏國夫人

敕婦爵從夫已極小君之號母貴以子游更大國之封
具封某迪德靜專處家約素相夫以禮躬孟光舉案之
勤教子能賢慕軻母擇鄰之訓相夫初政致位上台秩
既進于三孤貴遂登于累葉表茲閭範用配禰宮改北

國之舊圻畀東藩之新邑

劉氏改四塞之舊邦畀大名之新邑

申加閔冊

增賁宗祧

故妻魏國夫人徐氏贈秦國夫人

敕朕寵任大臣躋榮孤保爵既加于祖福恩又及其閨
門具封某生有令姿居循內則知巨源之識度相敬如
賓勉仲卿以激印及見其貴雖隔幽明之際仍深伉儷
之情夏篆通旌顯漢相元勳之重魚軒象服開秦川大
國之封九泉有知千載無憾

大理卿王善之直龍圖閣知平江府

敕具官某吳門地大物阜隱然東南一都會也爾生長
浙右固已習知其風俗又嘗持節臨之聲聞藹然至今
未忘矧明練憲章飾以儒術再長廷尉滋嚮用矣抗章
求外自詭治民為爾相攸無踰於此畀以義圖之直用
寵爾行豈惟不減昔人畫錦之榮吏民聞之不戒以孚
足以寬吾顧憂矣

浙東提刑陳倚大大理卿

敕具官某國家以臬事付廷尉而立制視古為祥治獄者無踰于定法斷刑者不使之鞠囚而卿實總之選顧不重哉爾習于憲章而持心近厚由廷評而上至于為長踐斂有年矣縮建寧之符持浙東之節又皆有稱焉肆疇已試還爾舊物囹圄屢空病未能也爾能盡心使刑獄號為平則庶幾乎古矣

知雅州宋南強知金州

敕具官某金城外控邊陲內連巴蜀有民有兵號為介

藩延藩之餘正須長才以任郡寄擇人于內豈曰無之
臨遣而行慮不及事疇咨西南之守就以遷焉以爾有
志事功敏於從事其解蒙山之組往撫漢陰之民此而
有聞朕將用汝

木待問知湖州

敷具官某儒科首選宦達相望儲禁舊僚收用略盡慈
皇初開南省爾則為多士之先沖人頃居東宮爾則任
端尹之寄而十年以來欲仕輒已朕嘗念之惟近臣為

明當途之誣浮議遂定吳興劇郡視古左馮衆所憚為
舉以試汝勿以多言為畏倚需最課之聞高爵美官豈
于汝吝

費培大理評事

敕具官某李官選屬必先試以文法然對有司之問者
易為工察庶獄之情者難于盡爾為廷評其以昔之所
習見于詳讞之際遇事加勉增益其所未至不倦以終
之則為稱職

福建提刑辛棄疾太府卿

敕具官某爾蚤以才智受知慈宸盤根錯節不勞餘刃
中更閒退以老其才養邁往之氣日趨于平晦精察之
明務歸於恕朕則得今日之用焉台從閩部長我外府
夫氣愈養則全明愈晦則光于以見之事功孰能禦之
哉

顏師古知泉州

敕均佚真祠遂彭澤賦歸之志起臨舊鎮慰潁川願借

之心匪曰朕私徒得君重既去家之不遠俾便道以有
行具官某學慕儒先朝推壽俊慨孔戡之去命典外藩
念陽城之勞許歸故里而遠毗懷其惠政賈胡服其真
清攀轅莫留垂涕相踵此誠心之所感非人力之能為
既徹聽聞重增嘉歎方遴選惟良之守要在求已試之
才追常袞之遺風當一變于閩俗用蔡襄之故事宜再
領于泉麾式適其驅以副所望

新寧國府林大中知贛州

敕具官某章貢居江右上流控楚粵之要民俗果悍可
以義服不可以力勝也非清德雅量練達世務者不在
師帥之選爾以不羣之資為有用之學治縣如古循吏
入朝為才御史彈劾不避於權要論議率中于事機橫
榻之風振于一時朕既分爾以宛陵之符念其家食易
鎮茲地先聲所臨百吏望風撫子南邦以寬憂顧朕豈
汝忘哉

廣東轉運判官黃掄再任

敕具官某朕分遣諫官御史使行諸道以廉察列郡之
吏知予德意多稱其職爾以端諒之資選在諫省去國
未幾使于嶠南善最有聞俾之因任既以慰斯民願借
留之意又以見朝廷不忘遠之仁母替厥初嗣有褒寵

宮人王安安轉郡夫人

敕朕謹乃儉德固無漁色之私選于後宮亦若審官之
遴宮人某稟資婉嫕祗事靜專被膠木之恩蚤預內廷
之御承小星之惠躡升名郡之封其益習于壺彝庶克

綏于寵數

直龍圖閣知贛州楊萬里秘閣修撰提舉隆興府
玉龍萬壽宮

敕具官某朝廷之於賢者用而盡其才上也用未盡其才
而勇退寵其歸而全其高次也上焉者朕之本心次焉
者非得已也爾以清節雅道冠冕一時高文大篇追配
古作出入中外聞望日休計臺西歸俾守章貢古郡取
治庶以優賢抗章自列欲留不可畀真祠之佚升論撰

之華詩不云乎雖無老成人尚有典刑朕不汝忘也

祕書丞陳損之淮東提舉

敕具官某常平使者之任重矣淮東鹽筴甲天下視他
路尤重貨泉所聚出入萬計調度低昂在一路部使者
事又重焉爾起西蜀慨然有志于當世通練閩敏遇事
風生周旋清塗久攝宰掾彌綸省闈備著賢勞視其官
可以知其才矣頃護使客往來淮堧歸論利病如示諸
掌茲因求外選而用汝勉哉思所以稱任使之意

起居舍人陳傳良經進壽皇聖政轉一官

敕具官某朕惟壽皇在御務行聖人之政二十有八年
傳祚菲躬懼弗克堪既以申飭史臣謹以事繫日之書
又擬其大端可以為法于萬世者別為一經追儷二典
真我家之盛事也爾以一代名儒晚登郎省親擢道山
付史史事奏篇來上奉之慈極從容進讀冠珮儼然茲
馬論賞盍先於衆命增一秩以示儒者之榮尚惟欽哉

浙東提舉陳杞本路提刑淮東提舉衛經浙東提

舉

敕具官某等浙東部刺史萃于會稽密邇行都視他部
為重祀以辨治之才為常平使者就畀臬事任益高矣
涇以倫魁之彥領淮甸鹽筴改授蕩節地益近矣其各
揚乃職使刑罰無冤公私兼足以副朕掄選之意

武翼郎左翼軍統制韓俊供職滿十年轉一官

武修

即馬軍行司選鋒
軍統制李郁同

敕其官某爾出自禁旅護我泉南

李郁改陪都

既歷十年內

外靖謚雖功名無事以自見賢勞著矣俾循故實序進
兩階益習韜鈴以俟選用

參知政事胡晉臣知樞密院事

敕朕纂承丕緒圖任舊人一日二日萬幾之繁勤于裨
贊三軍五兵之本茲益厚于倚毗乃播綸言式彰枋用
具官某氣全剛大識造精微以端靖結慈皇之知以忠
純為初政之輔同心同德人孰知房杜之功嘉謀嘉猷
日惟陳堯舜之道居宜鎮于雅俗動有助于沈機察其

所安任以不貳矧一登于政地凡三入于樞廷諒憲度之愈明畀事權而增重噫子欲務孝宣之周密以起治功爾其慕子房之從容用符眷意顧惟宿望奚俟多辭

同知樞密院事陳騃參知政事

敕贊本兵于右府方藉壯猷圖共政于邇聯尤資宿望我有明命告于具寮具官某學探聖源才周世務立朝審諤素為君子之儒處事精詳居有大臣之體升之常伯擢在機廷陳告后之謀猷簡而甚切贊基命之宥密

靜以無譁雅量鎮浮不改其度正身率下敢干以私曾
不俟于期年俾進陪于大政國以永賴人無異詞噫謨
明弼諧朕有望股肱之助任重道遠爾其推腹心之忠
永孚于休以副所屬

吏部尚書趙汝愚同知樞密院事

敕西漢以同姓疏封不在公卿之位東平以至親輔政
厥山聲望之隆惟我本朝尤厚皇族始則優加祿爵曾
弗仕于外廷後雖竝用親賢亦無踰于法從茲開宥府

蓋得宗英具官某派出天潢望高國器早隨寒雋首冠
予儒科出任藩宣久臨于蜀郡侍經帝幄選士貢闈皆
故事之所無在爾身而兼備爰以樞機之寄托之肺腑
之親必有若人乃堪大任匪固私于異渥將深慰于公
言噫開國以來未有今日非常之舉本兵至重當展平
生有用之才以增磐石之光以壯維城之勢

刑部郎中沈樞度支郎中

敕具官某爾生長相門明習文法為郎憲部恪守三尺

司度之職凡軍國之用會其入出以周知經費之數欲得清謹之士為之故以爾遷焉勿以郎潛為淹思所以稱其職者

太府寺丞沈作賓刑部郎官

敕具官某郎官必由宰郡而除憲部惟以明法而授行之舊矣爾出名閥通習憲章久歷廷尉之屬宜在茲選向守丹丘曾不煖席而去郡之日遮道借留其必有以得此者再入修門養資外府而後遷焉朕之用爾審矣

惟盡乃心以稱斯舉

右司員外郎應孟明左司吏部員外郎徐誼右司
敕具官某等宰掾非他官比也調護闕決皆天下事非
有才識可以為守常應變之助者疇克為之爾孟明介
然有守練達民事爾誼能為可用通貫治體一以序遷
一以選授朕方委政于二三大臣惟爾分任其勞使大
臣得以綱紀庶務助朕求賢以起治功豈小補之哉
度支員外郎王厚之直祕閣兩浙路轉運判官

敕具官某朕惟轉運之任莫重于畿內祇承慈訓率用
士人比年以來多稱其職爾庠粹諸生故家人物好古
博雅風裁素高克勤小物而知大體領使淮西聲望籍
甚為郎名曹侃然有守還畀道山之直兼按浙河之間
飛挽以時而用不乏調度有經而民不病表率諸道尚
其勉哉

監都進奏院朱致民大理司直

敕具官某詩云彼其之子邦之司直國家明謹用刑遂

以名李官之屬近復定制審閱奏當尤不可以輕授也
爾以儒學自奮而宰邑丞郡循良有稱入班于朝靖共
爾位選以命汝往哉惟欽

司農寺丞彭龜年祕書郎

敕具官某朝列多士皆以賢選雖不以日月為功要必
使宿其業爾丞大農屬耳茲又命典中祕書朕不以為
煩人亦無得而言以爾之才望有以當此也道山羣玉
之府涵養天下英才異時臺閣高選于此乎取何止讀

未見之書而已哉

中書門下省檢正楊經太府卿四川總領湖北轉
運副使張抑太府少卿湖廣總領

敕具官某等國家東巡吳會宿兵楚蜀示天下以形勢
給餉之任必選王人居之爾經奮身西南老成詳練樞
屬宰掾裨助為多問以蜀事了辯如響是用使爾于蜀
爾抑起自故家見聞殫洽屢持使節所至可紀荆湖風
土尤所諳歷是用使爾于楚寵以外府長貳之任將命

以行爾二人皆儒士其有以適緩急之宜無乏興無病
民使上下百城不擾而兼足相安而有恃則朕之顧憂
可寬矣

新知湖州木待問改知婺州

敕具官某浙河以西吳興為輔藩浙河以東婺女為名
郡視邦選侯委任惟均爾少為舉首聲振東南從吾春
宮徧歷寮案今投閣之既久命起家而作牧引嫌自列
易地為宜是行也非惟不使汝遠去畿甸苟盡心焉課

最易聞公論自此而定則朕之眷汝人無閒言矣

宣教郎史彌廓係秀王孫女夫轉一官

敕具官某爾以師臣之子娶秀郎之孫不習貴驕能勉
家學推恩爾室遂進以官往其欽承益務修進

朝奉郎給事中黃裳朝散大夫權工部倚郎謝深
甫磨勘轉官

敕嚴吏銓之課所以示百寮之公優法從之聯猶不忘
三載之改具官某再登朝著亟上禁途朱印橫經久藉

講磨之益瑣闡批敕尤高論駁之風

謝深甫云翔翔朝
着密勿禁途三輔

政清久資于彈壓貳
卿任重允賴於論思

茲以年勞應於治典爰陟文階之

等寢陞官簿之華其服恩榮尚殫猷告

張允中該修玉牒循從事郎

敕具官某慈皇寶牒之成一代之鉅典也爾為胥吏預
有勤勞既登仕版並進二階

知秀州趙克夫改知湖州

敕具官某爾守臨汀政最徹聞擢之嘉興尤號辦治理

財則不擾而集御史則不惡而嚴民甚安之湖在近輔最劇就以畀汝近歲皇族人才輩出爾宜在政事之科益勉所長為諸郡率朕將有以表異之

太學正顏棫知常州無錫縣吳獵潭州教授項安世召試竝除祕書省正字

敕具官某等國家開館閣以待天下士若必循次而進非所以示招延之廣也博採公言取以數路爾棫由舍法官學省爾獵方宰壯縣爾安世客授湖南一聞其賢

俱命給札前此殆未有也指陳時務蔚然可稱登之冊
府遂列英躔豈惟養有用之才抑以為多士之勸庶幾
巖穴之彥亦將樂從吾游焉

戶部員外郎趙謚陞郎中

敕具官某近歲郎選日重非外庸之著不在此選非資
歷之深猶置員外爾以名臣之孫更踐蘭省積其吏攷
就正厥名官簿寔高益思加勉

蘇大任太學正

敕具官某眉山蘇氏文獻相望爾雅派別以學自奮朕
覽薦牘召寘學館得天下英才而教育之何樂如此益
勤教事勉繼前良

趙不遼知西外宗正事

敕具官某國家宗支日盛散處郡國而溫陵長樂猶循
南西二京之舊各有司存以爾行尊而性淑奮由儒科
練達政事往其主盟糾合吾族撫摩孤弱而使之得所
教擗孝秀以率其不良振振麟趾之風庶有望焉

江東提舉苗黼戶部郎中主管右曹

敕具官某聚天下賢士列之朝行必更外庸而後收用
非惟欲重郎選亦以詳試人才亨途由是而薦之焉輕
畀也以爾馳聲膠庠資敏而練世故使行江右行部刺
史之體名對便朝嘉其忠蓋戶曹動關民事號為劇煩
往既乃心以副選擇之意

煥章閣學士知襄陽府張杓猷閣學士知建康

府

救憑熊軾于上游久資填撫之略畀麟符于重地尤藉
保釐之方是為留籥之司增峻寶儲之職具官某性資
闡敏智識縱橫樂父兄之賢源流有自登侍從之選敷
歷已深遇事敢言詞鋒甚厲臨機輒斷才刃有餘輟自
文昌出當方面果肅清于邊徼務宣暢于王靈矧是秣
陵實雄江左石城鍾阜六朝之風績猶存大纛高牙先
正之威名未遠俾居連帥益振家聲想具有于成謨顧
何煩于多訓

顯謨閣待制知江寧府章森煥章閣直學士知興

元府

敕荆楚與區無若江陵之重巴蜀外蔽實賴漢川之雄
我有侍臣更此名鎮峻增延閣之職用寵元戎之行具
官某稟氣冲和受材宏達早被知于慈宸亟登任于禁
途司留籥于陪都既騰善最建高牙于南郡名殿上游
眷炎劉始封之邦為元德必爭之地
此稱蜀漢昭烈帝之字宋時避廟諱故改
作元雲屯萬竈虎視三秦誦武侯出師之章諒其素

志審漢將登壇之策勉乃壯圖毋有遐心往祇成命

王蘭知江陵府

敕運魁柄于西樞嘗贊幄中之畫開帥藩于南紀茲分
閩外之權惟任舊人式孚羣聽具官某器資鯁挺智識
開通世傳許國之忠躬負濟時之略明目張膽在朝廷
無事不言聚精會神故君臣不膠而固輔予初改正位
本兵機謀足以折千里之衝文武足以為萬邦之憲退
安祠館寢閱歲華蜀道登天之難曲從私請荊州用武

之要勉為朕行諒無俟駕之淹倚聞洗印之報噫比周
家之分陝允屬宗工據天塹之上游是為重鎮尚體規
恢之志豈惟填附之圖

知興元府宇文价知襄陽府

敕唐制以山南分東西二道西則漢中為巴蜀之捍蔽
東則襄陽為荆郢之北門以是俱號重鎮而控扼之要
于今尤切謀帥其可輕乎具官某以學奮身世有名德
壽皇眷知擢寘華近遂居文昌八座之選出鎮漢中于

今五年撫安軍民帖帖無事襄陽易地委任惟均方時
小康邊鄙不聳輕裘緩帶折衝樽俎以追羊祜之遺風
不亦善乎

錢象祖吏部員外郎

敕具官某吏部之司七而右選最為劇曹涉筆終朝猶
恐不逮非夫精敏詳練之士不足以察吏奸而澄弊源
也爾明習吏事飾以儒雅分符持節民庸茂焉為郎未
幾銜恤而歸不俟造朝亟加選用靜以制動要以御詳

汝知之矣尚其勉哉

將作監主簿李大異司農寺丞軍器監主簿曾三

聘太府寺丞

敕具官某等大農外府分領食貨之重各設之丞以贊其長非才不授也爾大異強記洽聞處事有條爾三聘篤學厲操持論不苟簿正兩監退然安之竝進厥官各任以事以才自見今其時矣

秦煇知嚴州

敕具官某爾生長大家少而穎悟力學進德譽者交口
古括之政無愧循良嚴陵為高宗潛藩密邇行闕選而
用汝詳試其才益撫吾民以稱朕意

吳宗旦知舒州

敕具官某龍舒在淮右為名郡士大夫以剖符為樂而
朝廷必選才而後授之爾以學自奮明練憲章法家者
流自以為不及也律身範俗清裁可紀家食寢久精力
未憊往居專城綏靖淮服列卿之舊朕豈汝忘

權貨務監官修武郎陳仲堅董淵孫侁收超增羨
各轉一官

敕具官某等摘山鬻海之利權之以佐用度其數實廣
爾等協心奉法歲有贏貲何愛一官以勸來者

新江西運副錢端忠改江東運副

敕具官某爾以王人給餉江淮才諳著稱俾之將漕需
次已久持節有行小疾來諭尤見廉靖為爾易地以遂
其私輔養精神庸俟器使

幹辦審計司劉三傑將作監主簿王恬軍器監主


簿

敕具官某等爾等在太學為名流試劇邑為良吏以薦
入朝歲月當遷分命以勾稽之職而處三傑于大匠恬
于戎監職清而務簡益養賢望以俟甄拔

江西路轉運判官林湜吏部郎官

敕具官某尚書郎為當今妙選朝行雖有名士必更外
庸而後授之爾嘗我身冠凜有風采按刑浙東將漕江

右久攝帥間所至有稱賜環而歸敷奏詳雅資望高矣
然猶處之小選所以重銓綜之任也其究乃心以贊而
長



攻媿集卷三十五

欽定四庫全書

集部

文薈集卷三十六

詳校官右中允臣薩敏

主事臣呂雲棟覆勘

總校官庶吉士臣倉聖脈

校對官中書臣牛稔文

謄錄監生臣沈世政

欽定四庫全書

攻媿集卷三十六

宋樓鑰撰

外制

國子司業彭椿年除祭酒

敕具官某祭酒尊者之稱也荀卿任齊最為老師蓋三
為之後世遂以名胄監之長非夫儒先哲艾德齒俱尊
者豈輕畀哉爾蚤以文行表于諸生歷官朝行好禮不

變擢居小司成士論久已厭服為國學師無以易汝往
哉惟不言而躬行使人益觀感于規矩之餘則首善之
風振矣

樞密院檢詳李祥國子司業

敕具官某成均教事師道貴尊近歲雖長貳不並除而
為士擇師不應以此為拘也爾馳譽膠庠見謂前輩文
學行誼久服衆心諒直簡嚴不移素守郎潛以來藹有
師儒之望茲庸命以少司成之職追還古風變而至道

予以副朕作成之意尚勉之哉

左司諫胡瑒司農少卿

敕具官某朕之用人謹守成憲惟爾之用獨異他人始以編摩見于便朝奏對詳雅朕心嚮焉擢典中秘遂居六察居無幾何徑登諫垣期月之間屢獻忠諫引嫌自列執義不回俾貳大農豈朕初志往祇乃事庸俟甄升

同知樞密院事趙汝愚初除封贈

曾祖東頭供奉官士慮贈太子少保

敕國家親睦九族本支蕃衍侯王使相寵祿相望然雖
在近屬無子孫贈典之文惟爾孫曾進秉事樞追榮之
恩上及三世有宋以來實自汝始豈不榮哉具官某胄
出熙陵慶綿漢邸生長承平之日涵濡信厚之風不顯
其躬以燾于後本兵之任我得宗英推迹本原寵之官
保蜜章之渥賁爾九京

曾祖母龔氏贈高平郡夫人

敕士大夫遭時遇主致身兩地必有慶源之自仍多內

助之先矧在吾宗可無異渥具封某婉嫗之質幽閒之
度克相夫子寢大其家孫又生子起為公輔既錫曾門
之寵併推婦爵之崇惟沁水之名邦實河東之沃壤以
示廟祧之寵以增屬籍之光

祖贈秉義郎不求太子少傅

敕唐之宗室大用者九人而李適之為稱首追榮乃祖
褒冊典物焜照都邑行道者嘆著于史牒今爾之寵視
古過之具官某稟資甚賢為善知樂雖事功不見于世

而隱行實侔于天是生聞孫首致樞近既嘗逮事當揆所元用推黃壤之恩爰授青宮之傳三錫之命尚其未央

祖母太孺人晁氏贈咸寧郡夫人

敕惟晁氏世有名士在濟北號稱華宗女教既嚴壺彝可紀矧來歸于天族乃深篤于義方宜有後人克顯先世具封某結縭之訓蓋自家傳采蘋之儀實遵禮度相夫以道躬德曜齊眉之勤有子甚仁兼仲由負米之養

三遷之教燕及元孫

元孫之元宋時避廟諱所改

一命之榮昨之大

郡是為陽報尚服殊恩

父贈大中大夫善應太子少師

救躬行之實莫著于隱微天報之昭殆同于影響苟能用一日之力何必活千人而興惟深仁厚誼有以過絕于人則陰功隱德終當暴白于世具官某生長富貴遭罹險艱菽水僅充而事親有卧水躍鯉之孝伏臘未給而於人有解衣推食之仁片言可質于神明一飯不忘

于君父教忠之訓既著生前篤行之名遂彰身後朕方命爾元子貳吾西樞察其許國之忠想見過庭之學寵之師範冠彼儲僚豈惟禰廟之是崇抑亦宗盟之未有尚其英爽式謹歆承

母淑人李氏贈安化郡夫人

敕朕顯登樞筦既以崇趙氏之祧加賁幽原其可志孟母之訓具封某生自名閔歸于賢宗秉志靜專與少文而協趣處家約素為彭澤以志貧一門相勉以孝慈奕

世俱傳于清白是有賢子為予輔臣爰開順化之封用
示追榮之寵毋重杯棬之感庶寬霜露之思

妻淑人徐氏贈鄱陽郡夫人

敕朕竝用親賢延登宥密雖曰家傳之懿如麟趾仁厚
之風亦惟閭助之良有雞鳴警戒之道宜與偕老胡不
永年用加寵榮以賁冥漠具封某天資柔淑婦德慈祥
冊府道山才及見夫子英游之際副筭翟茀傷不逮小
君命服之榮獨惟南渡以來久寓楚東之近始封此郡

尚慰爾靈

知夔州趙鞏江西路轉運判官

敕具官某爾起書生有志當世頃由名曹出鎮淮右孳孳邊備論奏相踵易帥夔子民夷帖服事有當辯不已于言可謂首公忘私者矣大江之西漕事為重引以漸近朕意可知順流而歸祇率厥職

江西提刑劉光祖知夔州

敕具官某夔子之國介于楚蜀之間山川險固民夷雜

揉謀帥之重心惟通才爾正色立朝號稱敢言出擁使
軺威望日聳既授以江右之節矣尚茲家食非以優賢
分閭之寄易以命汝亟其洗印以安遠民

知昭州莊方知瓊州

敕具官某瓊管以四州之壤屹立海中實與番禺相為
引重大艱獻琛賴以為歸麾符不輕畀也爾進由儒科
練達吏事貳郡濱水承流昭潭必能習知南海之俗往
其輯寧蠻蜚勞撫賈胡以稱朕選侯之意

軍器少監章穎左司諫

敕具官某古者箴規之求下逮工瞽矧位于朝孰不進
言以諫名官視古已狹選用之際其可不嚴爾蚤以掄
魁寢登華序清標直節照映周行約史東觀橫經朱邸
端靖無華物自宗之擢居諫垣允協時望山甫補衮職
之闕孟子格君心之非尚惟勉旃以伸素蘊

將作少監黃艾右正言

敕具官某諫省設官備矣大夫而下幾于古諍臣之日

比方並建遺補俱以引嫌而去妙選時彥乃今得之爾
抱負不凡學為有用言簡氣勁宜備諫列輟自王邸命
以拾遺爾其振厲風采別白是非引經据古以佐朕之
不逮將虛已以聽焉

資正殿學士正奉大夫蕭燧轉一官致仕

敕朕睠言故老方深仄席之思遽覽封章乃有垂車之
請勉從所志殊嗚予懷具官某洪毅而裕和

洪毅之
洪宋時避

廟諱闕深而肅括擢儒科于紹興之際登朝蹟于乾道

之初自結主知蓋正人無待于助久司言責使天下想
聞其風遍儀論思獻納之班遂參輔贊彌縫之用粵從
去國亦既累年卧疾清漳興鄴下文人之詠掛冠神武
慕山中宰相之高爰序進于崇階以曲全夫晚節噫漢
疏知止既永謝于軒裳蕭傅素剛尚勉親于藥石

蕭燧贈金紫光祿大夫

較舊弼退休方徇辭榮之懇奏函踵至驚聞垂絕之言
撫往事以慨然愴吉人之已矣具官某名高一代仕歷

三朝官以諫為名真得諍臣之體后非賢罔又俾參議
嘏之尊雖為故里之歸尚佇壯猷之告云何屬疾亟願
乞身載覽遺章尚想伏蒲之氣優加卹典以彰告第之
恩庸寄予悲務昌厥後噫求馬周儀形之見遂隔九京
歌晉公柱石之衰重增一涕

知建康府余端禮吏部尚書

敕朝列選曹妙簡持衡之任位登常伯尤高荷橐之班
茲得名臣式符時望具官某稟資洪毅履行精純慈康

結知蚤預甘泉之侍儲闈列屬久陪少海之游頃出鎮于雄藩實典司于留籥既聞報政亟命還朝矧惟十載以來屢歷三銓之劇士論夙推于平允吏行素憚其嚴明乃于晝接之餘寵以天官之舊老成復進豈惟躬簿書期會之繁忠蹇自將正有賴朝夕論思之益其祇成渙用副虛懷

湖北提舉張孝曾夔路提刑

敕具官某夔子一道視四川為差近而山川深險雜以

夷蠻民物凋陋困于征取典刑之使選用不輕爾出自名家敏于吏事持節湖外斂散以時往按蜀門布宣德意使深山窮谷舉無冤民則庶乎得職矣

右正言何異湖南運判

敕具官某朕監觀四方志不忘遠寄耳目于部使者猶恐不逮故間遣諫官御史以臨之爾自登朝行雅有清望頃因奏對擢居憲臺升之諍臣之列方有賴于規益引嫌求外授節湖湘典司將輸光華煜然夫以峩廌伏

蒲之風抗攬轡登車之志揚清激濁在此行矣有猷以告母有遐心

四川制置使京鏜權刑部尚書

敕朕體列聖寬仁之訓務謹刑章求一時忠厚之臣俾居司寇久虛此位今得其人具官某器度恢洪才猷挺特蚤結慈宸之眷亟登要路之津修聘殊鄰壯蘇武持旄之節開藩全蜀慨王尊叱馭之行百城咸服其恩威四載備聞于勞烈爰示賜環之寵俾陞聽履之班錫以

贊書付之臬事罔蕪庶獄朕方推文王敬忌之心明用
五刑爾其慕臯陶邁種之德尚殫辰告以副予知

秘閣修撰知紹興府趙不流職事修舉除集英殿
修撰

敕懷會稽之章久煩填撫報齊邦之政可後褒嘉具官
某分派天潢服休仕路頃由淮甸來任飛蜀輓粟之司
旋尹京都遂登簪筆持橐之選起臨輔郡就擢帥垣迨
茲期年知職務之時舉去此一水亦舉言之日聞乃諭

柄臣俾陞寓職以璽書示勉勵之意母曰曩章使田里
亡愁嘆之心尚圖來效

梁季琚知光州

敕具官某爾父在紹興間以才敏致位文昌其後未有
至二十石者爾守上饒政務簡靜銜恤而去未究職業
浮光易治地則被邊舉以命汝委寄為重尚其勉之母
忝前人

李沐吏部郎官

敕具官某爾以舊學大臣之子自奮巍科寔登膺仕出
使閩浙有志于民為養求歸嘉其靖退晉接之頃處以
名曹親庭無信宿之遙選部乃攝承之舊往祇厥職無
復固辭

新知興元府章森改知瀘州

敕開藩蜀部曾洗印之未間易鎮邊陲又改轅而于邁
惟首公之有素諒承命而遂行具官某知略該通才猷
挺特進儀禁路入陪豹尾之嚴擢殿留都出擁麟符之

重由上流之奏課畀西道以折衝十年而守漢中田叔
固宜于久任五月而渡瀘水武侯豈憚于遐征矧羣情
安集之初藉元帥撫綏之力推君子之心置小人之腹
能坦然而不疑脫慈母之懷立嚴師之傍當翕爾而自
定亟祇成渙用寬顧憂

知福州鄭僑知建康府

敕開帥藩于閩嶠曾未彌年司留籥于秦淮茲焉易鎮
渴想儀形之見亟令郵置之傳具官某執德不回秉心

無競論議遠追于晁董文章高軋于漢周正色立朝尤
推批勅之手至公典選允藉持衡之權皂蓋頒春出臨
千里錦衣行晝就撫三山欲改畀于麟符仍從馳于驛
騎朝受命夕引道諒無憚于暑行退補過進盡忠正有
資于辰告入奉受釐之對徐為分閫之行惟我舊臣服
茲休命

廣東提刑李信甫江東提刑

敕具官某爾為御史直道而行出守信安旋使南嶠皆

有聲績可紀矧錄囚于嶺海煙瘴之地不憚深遠勞亦甚矣抗章求閒未應捨汝其典泉事于大江之東少休馳驅而後攬轡以行亦惟休哉

太府卿辛弃疾集英殿修撰知福州

敕具官某七閩奧區三山為一都會地大物阜甲于東南負山並海綿亘數千里舉聽命于大府連帥之選豈云易哉爾以軼羣之才蚤著事功壽皇三畀大藩寵以論議之華于今幾二十年召對便朝擢長外府益平豪

爽之氣而見溫粹之容朕心嘉焉比居外臺讞議從厚
聞人戶知之陞之集賢增重閩寄往其為朕布宣德意
撫吾赤子以寬一面之顧憂朕豈汝忘哉

著作郎黃由軍器少監

敕具官某著庭之選最為清高矧爾以掄魁之英譽諤
之氣周旋三館于茲有年經上要津無不可者然朝廷
序進人物不厭于詳薦紳綿歷事任不以遲速計也進
貳戎監仍攝劇曹益養資望以俟器使

司農卿沈揆權吏部侍郎

敕古有六官孰若天官之重部分四選無如武選之繁
茲擇貳卿宜求吉士具官某高文瞻麗古學精深自登
周行雅有清望凡一時華要之選以累載周旋其間壁
水道山為諸儒之領袖儲寮詞掖振六藝之英華屢垂
上于禁途復優聞于郡課蔽自朕志召長大農寵之荷
橐之聯畀以典銓之寄惟公可以守成憲惟明可以察
衆欺倚聞稱職之名用助官人之道

新知襄陽府宇文价改知遂寧府

敕朕惟今日謀帥之難深以數易為戒卿有大邦遺愛
之舊無嫌改命之繁具官某學有家傳才為世用奮身
西蜀膺慈皇特達之知累歲中朝歷儒者清華之選佩
印屢更于劍外分符最久于漢中峴首名藩方尋羊叔
子之迹遂寧舊治更喜郭細侯之來諒去思之未忘宜
外庸之益著往祖成渙嗣有寵光

知遂寧府單夔知建寧府

敕遠臨蜀部念頻年跋履之勞易鎮閩邦示鄉國旋歸
之寵具官某受才通敏蒞政精明繇廷尉之年蚤被慈
宸之眷擢侍臣之列最居羣彥之先祠庭寢闋于十年
帥閩雄開乎三峽旋更會府架著外庸仍次對之舊班
昇建安之新組山川伊邇諒少慰乎遐心民社匪輕方
有資于善政惟時舊德服我茂恩

張孝伯司農寺主簿

敕具官某爾以學自奮吏治有聞三入朝行閱歲滋久

凡爾等夷騰上多矣退然靖共物論歸之茲以序遷勾稽農扈尚共乃事以就器業

知廣德軍林孝友大理寺丞

敕具官某列寺皆有丞惟廷尉之屬其選為尤重必求通儒以治庶獄已試之效吾其捨諸爾頃居是官見謂稱職出守桐川又以最閒茲還舊班進用無壅惟明克允以副朕好生之意

中奉大夫知襄陽府張杓大中大夫知建寧府陳

居仁唐勘轉官

敕夙嚴銓法所以示百僚之公優待從臣猶不忘三載之攷具官某神機敏悟器度闊深禁路升華久聽星辰

之履帥藩因任蓋得江漢之心

陳居仁云性資夷曠學問淹該西掖代言雅得

深醇之體南邦共理尤明寬猛之宜

茲以年勞應于治典爰陟文階之等

益增侯服之光恩稱恩勞尚殫猷告

中奉大夫吏部侍郎沈揆唐勘轉官

敕制祿以官式序百僚之進在法當從乃登四品之崇

具官某儒學老成文華高勝儲家有執經之舊祠臣推
為誥之工屢結綬于朝行幾問津于禁路攝承民部更
一紀而有餘積累年勞雖九遷而未艾茲擢天官之貳
始伸銓格之優太中不易公卿庸表褒遷之渥大夫既
掌論議益思獻納之忠

新除兵部侍郎黃裳顯謨閣待制依舊嘉王府翊
善

敕朕惟國朝謹教子之法王府建翊善之官在太宗務

選正人惟姚坦最稱直士自時厥後何代無賢我有論
思之臣俾專輔導之任具官某以天下士從吾兒游自
典秘書已參講席雖寢歷瑣闥之貴曾不離朱邱之僚
誦典謨百篇之書既得坦明之制正春秋一王之法尤
多深切之言力辭武部貳卿之除俾就文謨次對之秩
予以究遺經之終始于示朕意之眷留尚服訓詞益
殫猷告

成忠郎邕州橫山寨招馬官黃世明轉兩官

敕具官某戎馬之須多自南徼爾招誘盡力累賞日厚
併陞二秩以旌其勞

敕賜進士及第陳亮承事郎簽書建康軍節度判

官廳公事

敕具官某三歲大比人徒知為布衣進身之途藝祖皇
帝有言曰國家設科取士本欲求賢以共治天下大哉
王言朕所當取法也廷策者再乃始得汝爾蚤以文藝
首賢能之書旋以論奏勤慈宸之聽親閱大對嘉其淵

源擢真舉首殆留以遺朕也尚循故事往佐帥幕益懋
遠業以須登用

集英殿修撰耿秉權兵部侍郎

敕長才被選嘗擢侍從之職未疾自言閔勞官職之事
少閒寢久簡記不忘既加晝接之餘復畀夏官之貳具
官某稟資端亮厲操堅剛篤志愛民雖細故必加遠慮
推誠致主無一事不以上聞屢布藩條率騰善最甫登
禁路俄領外祠乃俾賜環再趨文石之陞亟令持橐徑

歸武部之班益勵壯猶以答隆眷

皇叔祖少保士峴贈少師

敷屬近行尊當貴既無危溢年高德邵死生宜備哀榮
具官某迪德忱恂處心夷曠分暉帝籍雖坐致于顯融
席慶王門曾不形夫驕吝磊砢維城之望雍容鳴玉之
班奉香火于內祠允謂三朝之舊建節旌於輔郡更居
亞保之尊胡不百年困于一病驚奉章之上達愴遺
老之幾何輟九陛之視朝冠三孤而錫命噫高爵厚祿既

已見于生前卹典優恩顧何忘于身後尚惟英爽歆我
寵靈

武德大夫鄂州都統制張詔軍政修舉轉一官

敕具官某國家分屯重兵列戍江澣申飭將帥務嚴紀
律爾居鄂渚實當上游緩帶輕裘如一儒生而氣稟山
西沈鷺善斷軍政修整徹于朕聞何愛一官以示表勸
益勵戎昭用圖爾功

直秘閣京西運判朱晞顏直煥章閣知靜江府

敕具官某桂林為嶺右都會控制最遠帥閫久虛掄擇
尤遴惟爾儒雅醇明練達世故益嘗為部使者矣當鹽
筴蠱弊之後協心扶持民懷其惠輟京西飛輓之重還
撫南方增堯章寓直之名用為爾寵內安毗俗外戢蠻
蜚人心知向條教易孚予自以為得人爾其有以稱此
哉

廣西運判方崧卿京西運判提舉張釜廣西運判
敕具官某等嶺右分百越之半漕計匪輕京西總三司

之繁事權尤重爾崧卿儒雅飭吏廉按有稱是用易以
襄漢之節爾父清白傳家斂散惟謹是用圖爾桂林之
居道里略同委寄無異飛芻輓粟既資辦治之才攬轡
登車益抗澄清之志爾惟自勉朕不汝忘

太常丞李謙浙東提舉

敕具官某部使者任常平之寄一道之休戚繫焉朕固
不以輕畀而况近幾乎爾篤志于學力行其言弦歌之
政見于已試憂國之心形乎辭色輟從朝行畀以使節

旱澇之餘歲事未知周爰咨詢先事而圖浙河以東汝
其任是責哉

知寧國府蔣繼周知太平州

敕偃藩巨屏正資共理之良易鎮鄰邦允藉上流之重
惟時宿望聽我訓辭具官某經術融明材猷挺特歷居
言路凜乎中執法之威屢剖郡符翕爾東諸侯之最念
千里相安之久為三年報政之期乃曠當途猶為重地
民風純靜素稱道院于江東訟謀簡稀真是太平之官

府更藩舊德為撫黎民矧擊析之相聞亟驅車而及境
雙溪疊障難伸願借之私五馬一驄又得宦游之樂其
因詳試遂託外庸

木待問知寧國府

敕具官某朕念儲闈寮寀之舊罔匪極一時之選既已
延登四人為予宰輔其在外里居者亦未嘗忘也爾事
朕有素家食累年起為二千石以示舊恩相攸久之茲
焉始定宛陵為江右名郡以壽皇潛藩地望尤崇爾其

往為朕撫字吾民篤志賑卹以銷愁恨歎息之心豈惟有以副選侯之意爾亦將由是而進焉

成都提刑楊王休本路運判知閬州續者成都路

提刑

敕具官某等朕臨御萬方寄耳目于部使者地愈遠則任愈重蜀道萬里成都輿區其選又可知矣爾王休移自潼川方祇臬事易以漕節就按本道爾者自守閬風頗著能稱俾乘憲以表表列城使民之利病徹于朕聞

而朕之德意布于遐徼揚清激濁威愛兼舉則為稱職
矣

知常州陳謙湖北提舉

敕具官某為常平而置使專以惠民選名士以乘軺示
不忘遠邇服勤儒術抗志事功頃居編摩已著才望甫
試繁劇優有治聲往行重湖之區典司義廩之政貿遷
鬻海之利務在通商綏靖摘山之徒無致生事佇觀成
績嗣有寵章

吏部員外郎雷灝直煥章閣知平江府

敕具官某姑蘇古郡號稱吳門密輔行都最為重鎮地
大物阜訟訴實繁衣冠走集應酬不暇非寬博強敏之
士其何以居師帥之任乎爾以辨劇之才飾以儒雅嘗
以一邑之長膺千里之寄又以十連之帥撫五羊之民
名對便朝郎潛選部念未足以究爾之能也視邦選侯
為朕一行加以堯章之職用為臨遣之寵倚聞異政以
稱所蒙

章森依舊知興元府

敕國家謀帥豈命令之可移臣子徇公亦東西而惟命
閒因有為未免從宜具官某文有古風神無滯用以禁
路論思之舊為藩方師帥之良建業留都允藉保釐之
略江陵巨屏久煩填撫之威惟此興元控于蜀道念開
藩之未及又易鎮以有行不如舊貫之仍毋庸新尹之
告漢中地重肯形雞肋之書南國教明當息鼠牙之訟
尚圖茂渥以答顯庸

吳總知瀘州

敕禁路通班久遂燕間之適藩方謀帥允資撫御之良
方起家而臨民諒聞命而引道具官某胄出勲門而被
服儒雅世傳戎韜而深涉藝文澤笏彰纓舊為儀于朝
列擁麾持節屢宣力于坤維眷此瀘川控彼南徼民生
繁阜當勞來安集之餘軍律申明嚴坐作進退之節正
賴中和之正往宣寬大之書西平王之在唐固多賢子
諸葛侯之仕漢自有美聲益振爾家用固吾圉

知太平州葉翦知婺州

敕聽履而上星辰緬懷舊德把麾而去江海又著外庸
錫以明綸處之輔郡具官某性寬而有制道廣而能周
為天子之從臣最先衆俊主國家之大計殆過十年謀
謨備罄于忠嘉任已不形夫喜愠乃睽文昌之老伴臨
寶婺之區姑熟最聞未及賜金之寵括蒼地近何殊衣
繡之榮倚觀中和樂職之詩益表平易近民之政其祇
隆眷嗣有優恩

劉俟廣東提舉

敕具官某朕嗣服之初首下寬大之詔俾部使者分察屬郡務寬民力爾守岳陽推誠奉行凡加賦橫歛之病吾民者悉加蠲除幾去歲額之半薦章交上朕甚嘉之嶺海去朝廷遠畀爾一節專歛散之權推岳陽之意而行之遐邇其息肩乎

攻媿集卷三十六

欽定四庫全書

攻媿集卷三十七

宋 樓鑰 撰

外制

同知樞密院事趙汝愚知樞密院事

敕朕延登樞臣方務親賢之並用擢專兵本豈以日月而為功式隆磐石之宗益聳維巖之望具官某仙源有自天分素高發之以場屋之聲名博之以師友之問學

論思禁路真有諍臣之風填撫藩方著古循吏之績望
之堂堂折而不撓元齡孜孜知無不為卓爾士夫之間
居然公輔之器頃為儲臬已知許國之忠茲貳機廷允
見愛君之篤俾陞右府之長密贊中宸之謀增衍真腴
併昭異數噫三軍五兵之間雖未至于廟堂一日萬幾
之繁正有資于帷幄朕方越拘孛而圖任爾其勉忠力
以赴功惟既厥心同底于治

吏部尚書余端禮同知樞密院事

敕朝建幾廷實總事樞之要任專軍政尤資副貳之賢
乃圖舊人用稱隆委具官某氣和而有守資介而能通
蚤膺慈展之知褊儀清貫爰列儲闈之屬久事初潛提
身有肅括之稱立朝奏正直之德典銓衡于選部尤推
鑒裁之公守管籥于留都允藉保釐之略召還位著益
簡予充蓋君臣相知非一日之積而文武並用何二柄
之分屢登朝夕論思之班宜居夙夜宵密之地啓侯封
之土宇畀采邑之圭腴噫運籌帷幄之中當遠追乎前

躅折衝搏俎之上正有望于壯猶尚服寵光毋替朕命
萬鍾司農卿

敕具官某爾以才諳早為九卿去國久之擢冠宰掾任
己之際不見幾微召對便朝奏論詳雅是用命汝復長
予周禮之任王城內外儲粟動以百萬計上下仰給事
則浩繁往哉惟欽以稱朕意

通議大夫知樞密院事胡晉臣致仕

敕三年輔政是為股肱之良一旦乞身欲挂衣冠而去

勉從爾請深軫予衷具官某迪德粹和秉心正直尊賢
容衆無一毫忌刻之私學道愛人備四時溫厚之氣察
其有守任以不疑典封駁于東臺贊樞機于西府進參
翮瑕遂長本兵方期竭節以相資乃以沈疴而有請任
重道遠知許國之未量名遂功成奚退身之太早無君
子者如蒼生何噫垂車而傳子孫顧莫回于雅志就第
而問籌策尚有冀于壯猶其服寵光以綏吉履

胡晉臣贈金紫光祿大夫資政殿大學士

敷抗章自列俯從納祿之言遺奏上聞猶篤愛君之義
驚柄臣之已矣撫用事之愴然具官某天賦純誠世推
厚德仁必有勇立朝多謇譎之忠正而不它致主盡忠
清之節自登近弼可謂大臣何抱疾之遽深願辭榮而
勇退始猶未許遂不可為愛之欲其生謂何恙之不已
死者如可作微斯人而誰歸加秘殿之隆名極文階之
三品俾昌厥後均賜以官噫命方士而求馬周空軫如
存之念輟餘瓜而奠如晦徒增追悼之懷顧一鑑之既

亡嗟九京之何及尚惟英爽歆此寵靈

潼川運判劉光祖奏儒林郎知資州龍水縣楊安
益賑濟有方循一資

敕具官某潼川去朝廷遠頃修荒政部使者察一道官
吏之能否以龍水為最而聞於朝進爾選階以示褒表
徐元德知均州

敕具官某均之為州雖遠以其控制洞壘置武當之節
使填無一境任不輕矣爾蚤以經學教授鄉里旋以聲

望登進朝行貳郎新安績用深著剖符茲土以惠遠民
往哉惟欽益行所學

太常博士陳棟秘書丞著作佐郎李唐卿著作郎
秘書郎范仲黼著作佐郎校書郎王奭秘書郎正
字蔡幼學校書郎

敕具官某等道山羣玉之府聚天下英俊其間所以涵
養器業以為進用之儲也爾棟以容臺議禮之舊爾唐
卿爾仲黼登瀛既久爾奭爾幼學給札著稱或于典丞

郎之職或序進著作之庭校讎未見之書不改共二之
故職優選遊執邁于此其思稱崇獎之意以為邦家之
光

大學博士邵康太常博士曾秘國子博士太學錄
雷孝友國子正田澹並太學博士

教具官某等博士秦官掌通古今員多至數十人國朝
稽古建官凡以博士名者皆清選也爾康學問該洽俾
議禮于奉常爾秘資稟純篤俾典教于胄學爾孝友爾

澹俱以上庠糾正之職陞教育之任一日而拔士以十數亦足以知朕好賢之意也其祇明命毋曰序遷

費士寅藉田令

敕具官某朕立賢無方視所為主苟得茂才多列于朝爾以西州之雋褒然為舉首薦口既重又當有以表異之往司帝藉實預容臺清華之選權輿于此惟務靖共以俟甄拔

主管吏部架閣陳希點國子正湯壽國子錄

敕具官某士修于家而任于朝又典膠庠之教事可謂
榮矣爾希黜蚤上甲科久為掌故爾疇首冠南宮未登
華途嘉其靜退之風俾參樂育之選雅有聲望司予成
規子率以身疇敢弗恪

湖南提舉郭德麟宗正少卿

敕具官某宗正一星在帝座之東朝廷以屬籍為重設
官以象之卿少之選亞于太常非他寺比也爾以諒直
周密久司六察之職出持使節深簡予衷賜環來歸優

寘少列豈徒為養望之地將有以進汝焉

皇叔祖贈少師士峴追封郡王

敕冠三孤之位既頒卹典之優疏千里之封更極真王之貴具官某分暉天派擢秀宗支琚瑀珩璜允矣朝儀之肅橐兜戟纛居然將閭之禁雖平生坐致美官而終老不愆素履逮朕纂承之始方形親睦之風曾頒爵之未遑乃抱疴而自晦云何不淑遂止于斯噫措笏垂紳愴典刑之安在分茅胙土尚冥漠之有知用慰爾靈益

昌厥後

士峴女三人並封縣子

敕某人朕丕承慶基崇篤宗老凡今屬近行尊歷事三朝如爾父者幾人奄其告終遺奏來上粲然三女願賜湯沐朕何愛大邑之封不以慰爾父之意乎益懋壺羹以對隆渥

同知樞密院事余端禮初除封贈

曾祖慶太子少保

教士有致位廟堂而光顯于時其上世終身韋布而追榮於後惟源流必有所自而貴盛亦豈偶然具官某樂道丘園隱居閭里人無知者實有侔于天我自得之故無待于外比及三世乃生其樞朕方以儲閣舊學之臣擢居宥府基命之地首以宮保之亞用為曾月之光豈徒顯爾宗之祧抑以為善士之勸

曾祖母徐氏齊安郡夫人

教朕延登儲寮進貳樞筮既已寵及上世又念伉儷之

賢必有以相之者故加以小君之號焉具封某生太末
之樞盛偃王之族嬪于良士託以終身諒閭範之可稱
至曾孫而遂顯擇黃岡之佳郡開石窰之新封賁爾泉
扁歆予渙渥

祖鐸太子少傅

敕君子之澤既被于後人朝廷之恩宜及于先世有德
必大可攷不誣具官某探六藝之遺言為一鄉之善士
雖文學行誼不見于用而孝悌忠信能行于家再傳而

金匱要略卷之三十一
卷三十七
興致身樞近推迹先祖之自欲亢余氏之宗青宮六傳
舉以命汝尚惟不泯服茲寵靈

祖母傅氏高平郡夫人

教儒者篤行不顯於世而能垂裕子孫則亦惟閨門能
循法度以為之助追贈之寵歿宜共之具封某謹蘋蘩
之儀佩圖史之訓克事君子相敬如賓是生賢孫為朕
良佐以高都之名郡為湯沐之新邑惟爾靈其預享之

父贈通邑大夫繪太子少師

敕信安自趙抃以來仕登宰輔不過三數人我有本兵
之賢固由自致跡夫義方之教當揆所元具官某秉心
靜淵履行淳固分薛包之田而愛形于兄弟折馮驩之
券而義篤于鄉閭積善有餘固非一日之力延師不倦
遂成令子之名周旋清班登進宥府蜜章加贈屢升法
從之階禰廟益親獨遣宮師之選以示教忠之效以寬
追遠之思

母淑人虞氏咸寧郡夫人

教士之家傳固出父師之訓古有胎教實由母氏之賢
仕既顯于朝廷寵宜加于泉壤具封某天資婉嫕婦德
靜專謹以事夫遠追舉案之美勤于教子不媿斷機之
言雖魚軒不見于生前而鸞誥屢頒乎身後茲錫義川
之號蓋由樞筦之恩慶則有餘澤其未艾

妻淑人葉氏信安郡夫人

敕大臣許國能有羔羊正直之風夫人起家必如鴉鳩
均一之德既資內助之力宜啓小君之稱具封某姆訓

是遵壺彞甚飭相爾夫子不以事物嬰其心為時名卿
得以庶白厲其操位登兩地之貴恩霑三世之先矧惟
魚軒宜爾象服視樞臣而命爵就鄉郡以疏封益肥汝
家庸稱予渥

浙東提舉李謙乞將合轉朝奉郎一官回授

本生父珮贈承事郎

敕具官某故本生父某朕方以孝治天下凡以親為請
者多曲從之爾世有令德躬履持操是生賢子而嗣其

兄既以能顯其父母矣願捨外郎之一秩求贈本生之二親淳化淳熙況有故事是用寵爾以廷評之階詩不云孝子不匱永錫爾類爾子方為部刺史以此風厲郡邑其助吾風化多矣

本生前母王氏本生母陳氏並贈孺人

敕具官某故本生母某氏爾有賢子出繼伯父既顯其親又追惟本生之重願加贈典有司已援舊比且言員郎所係為重而其請于義可矜足以勸臣子榮親之孝

朕曰俞哉並進湯沐之封以為泉壤之寵

胡澄知光州趙彥琬知容州

敕具官某等光山之在淮右今為保障之區容管之在廣西舊為經略之所選候而往寄任匪輕以爾澄起由名家嘗奏即課爾彥琬秀出天族游佐藩條往分顧憂當體朕意有政可紀無遠不聞勉哉

四川總領楊經直寶文閣提舉四川茶馬

敕具官某爾以宰掾之長往餉蜀門之師萬里馳驅之

勞計當入境四川權救之寄尤在得人與其遴選于中朝孰若就煩于便道載頒英蕩寓直寶圭摘山以惠遠人市駿以備戎事惟卿聞之在望宜利病之詳聞往既乃心用揚厥職

淮西提舉張同之奏修職郎安豐軍六安縣令陸子虞救活被水人一千四百餘人循一資

救具官某鼓鐘代磬淮有三洲詩人所以興嘆也安豐之潦朕聞而念之部使者謂爾有字民之能乃得救災

之術進爾一階又以少徇父老借留之意其亦寵矣益
勉之哉

朝奉大夫知叙州計孝似夷賊作過不能彈壓降
一官

敕具官某夔道被邊郡將實作控御之寄而威令不申
夷獠侵侮驚擾邊氓害及徼吏久而後定是不于汝而
誰責哉其上一秩尚思後圖

朝散郎叙州通判李裋孫節制義軍驚動夷賊降

一官放罷

敕具官某遠夷匪茹侵我王略爾為別駕受帥檄而不進擁義軍以自尊致此猖獗而又貪功倖賞迹狀昭然削秩免官以示邊吏之戒尚為寬典其務省循

諸王宮教授楊大灋國子監丞黃度並監察御史
敕具官某等憲臺設屬實分六察之司御史虛員當極
一時之選孰堪此任今得其人以爾大灋以端恪之資
而達于時宜爾度以深沈之量而敏于吏事舊臨劇縣

俱著能聲嘗對便朝各陳讜論尚忠而用夏政既已先
明詔之頒約史而作宋經亦已攷遺編之載並加親擢
蓋自簡知爾其助正紀綱振揚風采務求稱職之實毋
負官人之能

福建提刑盧彥德本路運判

敕具官某爾屢持使節為時老成暫居卽曹復按閩部
祥刑之寄方藉平反將漕之司又煩調度不改山川之
舊仍頒郡邑之條益靖吾民以稱朕指

知郴州吳鑑湖南提舉

勅具官某爾以冊府之英起當郡寄慈惠之政徹于朕
聞夫士之務學固將見之用也始以宜章之最俾任一
州繼以郴陽之能得廉一道矧是湖湘之遠方當旱潦
之餘醴茗阜通雖攸司之甚重倉庾斂散尤荒政之宜
先爾能究心部刺史之職則朕之用汝等而上之庸止
此耶

曾集知嚴州

數具官某贛川之曾人物相望仕至二千石者前後以
十數聲績茂焉爾習于家傳有志乎古試以舉寄有志
乎民還奏便朝嘉其詳練惟嚴陵之輔郡實高廟之潛
藩分以左符用撫吾民由小州得大州蓋亦寵矣益勉
厥職以大爾家

沈維知房州

數具官某爾以相家子明習文法自致廕仕蓋嘗久于
廷評為丞為正又出為二千石矣中更間退閱歲滋深

起爾于家俾分房陵之符戢吏愛民省刑節用治郡之
大端也爾皆知之奚俟多訓

知江州王師古廣東提刑知吉州胡長卿廣西提

刑

敕具官某等國家分道遣使以祥刑為重嶺海之遠尤
迷于擇人爾師古奏潯陽之課爾長卿報廬陵之政俱
以儒雅節吏踐馭歲久授之軺傳其必能為朕審用刑
章平反庶獄使百城之民自以為不冤亦惟休哉

吏部員外郎錢象祖陞郎中

敕具官某爾自淳熙初元攝事列曹今二十年矣三易州麾一擁使節凡今卽吏出入省戶未有如爾之久者也茲以積攷始正其名資望俱高益稱詳練雖曰銓法尚服優恩

新成都府司戶李僑乞將所得官資回授父証贈
迪功郎母廖氏贈孺人

敕具官某士之發策決科以求仕也爾之子萬里造庭

自序已后
卷三十七
得官名都而求致其事以榮二親此非追遠報本不可
解于心者能之乎朕甚嘉之曲從其請予以風厲四方
使知慕焉

新徽猷閣學士知建康府張杓依舊知襄陽府

敕金陵為帝王之宅方藉保釐羊祜得江漢之心爰加
因任具官某忠嘉傳世才智絕人兼言語政事之科何
施不可更彈壓惠養之政易地皆然惟今襄陽在昔畿
甸暢皇靈于遐徼控天塹于上游謀帥留都已畀玉麟

之重還車舊鎮諒多竹馬之迎惟首公而忘私遂聞命而引道吏民如故不煩條教之載頌城郭重來但覺精明之頓改其祇茂渥以訖外庸

左司應孟明中書門下省檢正右司徐誼左司員外郎

敕具官某等宰掾之任重矣自爾二人為之實能謹守程度參稽事宜佐吾二三大臣以平章中書之務大臣亦言其能朕用嘉之以序而遷滋嚮于用益習天下之

事以昌遠業尚勉之哉

何澹煥章閣學士知泉州

教弄大夫之印方渴想夫嘉猷分刺史之符尚往臨于
重鎮眷知有素中外惟均具官某名擅倫魁望高風憲
由辟水師儒之任歷騎省諍臣之班披腹而呈琅玕獨
任臺綱之長把麾而去江海更觀吏治之優矧是泉山
實雄閩嶠徒得君重勉為朕行煥乎文章示西清學士
之寵凜然風采增南國諸侯之嚴倚聞報政之期其體

顧憂之意

樞密院編修官呂棐太常丞

敕具官某三丞號高選而容臺為最不惟禮樂是司凡朝廷有大議必咨焉是可以輕畀哉以爾奮自儒科又精吏事持論不苟廉直自將久於編摩擢實華列惟寅惟清往贊兩長

國子監主簿王源國子監丞

敕具官某胃監以教養人才而金穀細務采實司之爾

父頃在從班有批勅之風能繼世科風烈未遠久服勾稽之職就俾序遷資望寢高尚思所以稱其家者

監登聞鼓院李友直宗正寺主簿監都進奏院羅克開國子監主簿

敕具官某等國家銓擇人才進各有敘勾稽之職在寺則司宗為清在監則胄庠為重以爾友直儒學老成舊傳夫素業爾克開士行修飭自奮于世科進官于朝雅有賢譽俱遷簿領實階華途罕務靖共以祗朕命

潘景珪知湖州

敕具官某吳興名邦今為輔郡地大而民阜賦重而訟繁視邦選侯弗以輕畀爾練達吏事明習憲章入從出藩踐駁舊矣起家為二千石顧豈擇地而後安移前日彈壓之威而為惠養之政尚優為之以稱朕意

沈瀛知江州

敕具官某大江之險分戍重兵潯水之陽號稱要地軍民錯處牧御須才爾奮迹膠庠馳聲場屋仕雖三已而

無愠予豈一端而取人既輟新安之行復分共理之寄
綏靖十同之衆撫安萬竈之屯此而有稱進則未艾

承節郎叙州管界巡檢程仲乾因夷人作過被殺
特贈兩官與一子進武校尉

敕具官某爾為徼吏勇于捍寇而捐其軀謀雖不足過
于逗撓自全者遠矣以二秩告第而官其子庸勸邊臣
之用命者

湖南提刑孫逢吉秘書少監

敕具官某道山羣玉之府聚天下英才其間必又求才
之傑然者領袖之遴選之久今得其人以爾稟資端方
充之以學九流百代之書該綜無遺良史之才諍臣之
風爾實兼之頃由少司成出使湖湘刺舉惟公風采凜
然是今日第一流人物也還為少蓬孰不曰宜來游來
歌以副虛佇

楚州奏忠訓郎添差副將魏昌教習效用弩手轉

一官

敕具官某爾以名將之子習于戎昭練兵山陽守將以告授之一秩以勵能者

蔣藺邵公翰奚士遜邵衮並大理評事

敕具官某等理官之屬惟廷評為甚勞獄成之告必躬必親非習于文法者不在茲選今又試以經術蓋欲兼用儒者也爾等俱以場屋之舊明司空城旦之書而中其科虛位既久並舉而用各揚乃職使人知引經決獄之效焉

太常少卿薛叔似秘書監

敕具官某朕以冊府為重選才甚嚴信宿之間既得逢
吉為之貳又俾叔似長之所謂朝取一人焉拔其尤暮
取一人焉拔其尤士論翕然朕亦自樂于得賢也爾問
學淵博論議明辯結知慈皇擢在諫省有古諍臣之風
遠乘軺車歸貳容臺物望無不宗之既授以太史氏之
職復使正此久虛之位表儀雋游儒者之至榮也雍容
養望以俟甄擢

司農少卿詹體仁太常少卿

敕具官某奉常惟禮樂是司而去古寔遠放失尚多非得博物洽聞學有根據者未易輕畀也爾少明經術務為有用探蹟索隱恥一物之不知總餉之久蓋已由郎省而貳大農矣召對雍容效忠無隱其為朕典禮樂之事鐘鼓玉帛抑末也尚求其本而釐正之

蔡戡司農少卿

敕具官某爾起由名家以甲科自奮登用最蚤駁歷已

多深沈之度，庶退之節。朕知之舊矣。比總軍儲，嘗貳外府。升之農扈，備予九卿。朕欲收拾人才，共興治功。覽爾奏篇，又有得士之喜。顧豈獨望以周稷之事，然積貯天下之大命也。方平糴以為備，尚贊而長。使事集而民不擾，則予汝嘉。

新知泉州何澹兩易知明州

敕起鎮泉山，將趨于閩。部易麾鄆水，併護于瀛。壩凜開憲府之名，增光制閩之寄。具官某，受材精敏，履行粹和。

場屋文鳴蚤先衆俊朝廷德選寢歷華途屬子纂紹之
初賴爾論思之益擢居騎省端有古諍臣之風進長烏
臺真得中執法之益遽收朝蹟再更歲華游界郡符俾
近畿甸地當一面海帀三陸蔽遮浙河之東控御島夷
之外布宣德意豈惟欲田里愁恨之銷敷暢王靈正欲
藉文武威風之重倚間成績嗣有殊褒

知明州朱佺兩易知泉州

敕具官某才有小大之異而選用當適其宜郡有遠近

之殊而委寄之重則一爾詳練世故敬歷仕途鄮嶺分
麾報政久矣溫陵改鎮易地皆然此則控東夷之要衝
彼則據南海之都會內修侯度外暢王靈諒無憚于脩
途當復間于善最

司農少卿胡瑒湖北運判

敕具官某朕臨御萬方寄耳目于部使者又間遣諫官
御史為之俾遐陬之氓如在畿甸矧湖右實據上游而
外臺當軍民錯處之地任顧不重哉爾外靜而內明言

簡而氣勁一見而決亟實諫垣雍容論奏多所裨益乃
自引嫌遷貳大農司外再三察其勇退茲用授爾以飛
輓之寄為官擇人非以遂爾之私因事進規無忘愛君
之意

高文虎將作監丞

敕具官某朕旁招俊又布列周行德進言揚如恐不及
矧以太史氏之舊引疾家居十有四年昔病今愈予環
可後乎爾博學篤志承伯父之傳網羅舊聞述史遷之

緒採之公論僉曰汝賢再轉為丞尚居繕監職務清簡
可以卒汗青之業毋以匠為嫌也

汪粹軍器監丞

敕具官某爾舊弼之子以才自見出臨邊郡綏靖有方
奉最言歸論奏明辯丞于戎監孰不謂宜矧爾久在塞
垣有志事功除戎器以戒不虞國之務也亦惟欽哉

戶部侍郎趙彥逾工部尚書

敕攷六典之書實重冬官之職總百工之事今惟起部

之司乃得宗英俾居常伯具官某聯休天派擢秀儒科
立志孤高萬鍾何加于我持身廉潔一介不取諸人令
名遠紹于間平惠政偏加于楚蜀任國大計為予良臣
朝夕論思有猷必告簿書期會惟正之供勤勞已著于
巧咸寵數遂登于八座親賢並用朕方隆睦族之風技
巧咸精爾尚敬若工之命

攻媿集卷三十七